

Upernaviup eqqaani nunaqarfimmi Kullorsuarmi timersortarfiliornissamut Naalackersuisut AIS 2016-mut 25 mio. koruninik immikkoortiteqqullugit peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Hans Enoksen, Partii Naleraq)

Akissuteqaat

(Ilinniartitaanermit, Kultureqarnermit, Ilisimatusarnermit Ilageeqarnermullu Naalackersuisoq)

Siullermeerneqarnera

Upernaviup eqqaani Kullorsuarmi timersortarfiliornissamut Naalackersuisut aningaasanik immikkoortiteqqullugit Inatsisartut aalajangiinissaanik siunnersuummut Naalackersuisut aallaqqaasiullugu qujapput.

Timersornermit kulturimullu illut atortorissaarutillu timimut tarnimullu pitsaasumik sunniisarnerat Naalackersuisut ilisimavaat. Atuarfitsialammi ilinniagassatut anguniakkat isiginiarlugit atuarfimmik sanasoqarneranut Kullorsuup Atuarfissua assersuutissaqqippoq. Atuarfiup saniani timersortarfeeqqamik 12x20 meterisut angitigisumik atortorissaarutit ilanngullugit sanasoqarnikuuvoq. Timersortarfeeraq aamma piffissap atuarfiup avataani timersornernut assigiinngitsunut atorneqarsinnaavoq, atuartuinnaangitsunit aammali nunaqarfimmiunit tamanit.

Suut pingaartinneqarnerunissaannik innuttaasut qinikkallu namminneq tulleriinnilersuisinnaatitaaffeqarput. Kullorsuarmi timersortarfimmik sananissaq Qaasuitsup Kommuniata kissaatigisaani ilaanngilaq.

Sunngiffimmi illut atortussallu, tassunga ilanngullugit timersortarfiit, kommunit suliassarivaat. Init kulturikkut ingerlatsinermit sunngiffimmilu atugassat, aammalu timersorfissat sananeqarnerannut akisussaaffik Kommuniniippoq. Kulturikkut ingerlatsineq sunngiffimmilu sammisassaqartitsineq pillugit Inatsisartut peqqussutaat nr. 10, 21. maj 2002-meersoq Kapitali 9, § 34 imm. 2 naapertorlugu Naalackersuisut tapiissuteqarsinnaapput timersortarfiit sananeqarnerannut, iluarsarnerinut aaqqissuunnerannullu.

Kalaallit Nunaanni Timersortartut Kattuffiat (GIF) Danmarkimi Idrættens Analyseinstitut suleqatigalugu Kalaallit Nunaanni timersornermik misissueqqissaarnissaq nammineerluni aallartinnikuuaa. Misissuinermit illut/atortut kiisalu innuttaasut timersortarnermi ileqquinik tamanullu atatillugu unammilligassanik periarfissanillu takussutissiisoqartussaavoq. Misissueqqissaarneq taanna anguniakkanik sammivissamillu toqqaanissamut atorsinnaavarput.

Tamanna tunngavigalugu siunnersuutip itigartinneqarnissaa Naalackersuisut inassuteqaatigaat.